

## ESUSËN UAN ISMIAID

### *Nëidba chuiquin Uanën dada uaid*

<sup>1</sup> Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu — quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. <sup>2</sup> Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tanti. <sup>3</sup> Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

### *Esus tantiaquidon iste dada uaid*

<sup>4</sup> Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiemi. Nidaid uabi yec ëndenquimboshë icpampidi nëbi adquid

yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. <sup>5</sup> Aton Mado Esuquidistu Nuquin Papan bëdamboen iste tantiamequidquo nec. Abia aton dada unëstiapimbo icquid icmequin uincuemiaidquo nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquo nuqui tantiaquidquo yec nuqui icsaid bedshunuec abided cuidadec unëspondash. <sup>6</sup> Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquo nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquo icquin. <sup>7</sup> Aidquo tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquo isendac. Con matses ambi unës uaondaidquo chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

<sup>8</sup> Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquo nebi. Nidaid uabi yec ictenedi nebi. Nëbi adquid yec nibëdantiapimbo icquidquo nebi. Adquid yec abitedishun Icbombo nebi —queposh Nuquin Papa. Aidquo tantianuna.

*Dacuëdampamboecnuc Esusën ismiaid*

9 Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiasho Èsus tantiesabon chieshëmpondashi. Adoac Esusën namiacpadec chieshtoenuio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacbimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. 10 Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacbimboec comapenec onquesho tantiapombi. Ushenquio icquimbi ushquin isacbimboen tantiombi. 11 Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidedishun iste dada uashun buame —quequin comapenec onquequin chuiposhi.

12 Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaaidquio neposh.

13 Aid nënantanquio Esusquio icposh. Con

matses isadaidbo chuiquid dapabimboec  
 dasiuidaccosh. Dashcute ënapen icquid abitiombi  
 datonquiacosh. Abi shictonquete bëshpiu-  
 bëshpiuctsëcquid nuacquid dapambo icposh. <sup>14</sup> —  
 Icsaisambo nec —camenuc aton mapi aton  
 manëdaidbëdi abu ushubimboec ushumboshë  
 icposh. —Matsesën naidtedi tantiaquidquio  
 nec —camenuc cuëte isquidbimboec aton  
 ëshë isquid-isquidquio icposh. <sup>15</sup> —Utsin:  
 “Ëmbiquen abitedi namenu,” catiapimbo  
 icnuc abitedimbo namequid nec —camenuc  
 shocosh piu nacnenaidbimboec nac-nacquio  
 aton taë icposh. —Nuquin Papapadquidquio  
 nec —camenuc acte chododoquiacbimboec  
 comapenec onqueposh. <sup>16</sup> Abiucshun uispa  
 7tedi sanamposh. Chështe cuënumbo icquid ana  
 shëcuënuësh cueshqueposh. —Matses icsaid  
 cuidquidquio nec —camenuc adposh. Aton  
 bëtantete ushëbimboec bëchamauanquiecposh. —  
 Bëdambo icquidquio nec —camenuc ad icposh.

<sup>17</sup> Dacuëdampamboecsho istanequini Esusën  
 dayumbi uebudpaccoc unësaniacbimboec  
 padishec. Adshobini Esusën camishquin  
 bëdameposh. —Dacuëdenda. Nuquin  
 Papapadquidquio nebi. Nidaid uabi yec ictenedi  
 nëbi adquid yec nibëdantiapimbo icquidquio nebi.  
 Adquid yec abitedishun Icbombo nebi. <sup>18</sup> Adquid  
 yequi matsesën unës uaid yec uincuenash  
 padpidec unëstiapimbo icquid nebi. Adquid icquin  
 ëbi tantiaquido unësacsho uincuemeshun Con Pa  
 yacno ëbëdi tabadmendambi. Ëbi tantiesaboembi  
 icsaido cuidacno nidmendac —queposh Esus.

19 Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. 20 Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusèn.

## 2

### *Epeso yacnocquido Esusèn chiaid*

1 Aden Esusèn uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. — Ëbi tantiaquido chuibanquidën Icbo yec ëbi tantiaquidobëd iquebi —quequin aden ismeposhi. Adshumbic naden chuiposhi. — Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. 2 Mimbi naidtedi tantiaquid nebi. Dayacquo icquin ëmbi chiacpadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Ëbi tantiaquido icsamenuen chiec:

‘Esusèn namiaidquoio yec mibi chuinuec chopobi,’  
 quequin muaquidon chuisho: ‘Mua. Nuquin  
 Papan chiaidpenquoio mimbi chuibanoque.  
 Utsibo chienda,’ quequin mimbi aidon chiaid  
 tantienquoio iccoc. Aden mimbi bēdamboen naoc.  
<sup>3</sup> Adembidi utsibon chieshēnaqui chieshtoenquoio  
 icquin Nuquin Papan chiaidbēdta ěmbi naid  
 mimbi chuibanoc.

<sup>4</sup> Aden bēdamboen nasho isun mibi icsaid  
 abentsēc chuitsēcnu. Tauamboen mimbi ěbi  
 tantiaquiopadene. Aden ěbi tantiaquidquoio  
 icquin mimbi utsibotsen tantiaquiopadene.  
 Adodeneděmbi pacuēnēdadbimboen ěbi bēdiactsēc  
 tantiatsēcquin utsibotsen mimbi bēdiactsēcbidi  
 tantiatsec. Adec mibi icsacuededec. <sup>5</sup> Ěmbi  
 chuiboed tantiash: ‘Ai, abimbo caic. Tauamboen  
 Esus tantiaquiondaidi nēbimbi bēdiactsēc  
 tantiachitec. Adchitequini icsaoc,’ queshun  
 tauamboen mimbi naondacpadomboen ěbi  
 tantiaquiota. Adembidi utsibotsen tantiaquiota.  
 Adoenquoio icshoembi mibi yacnoshon ěmbi  
 chiaid mibi chuibanquid nibēdmendac. Adnuc  
 ěbi tantiec cuēdēnuec mibi pudued-puduedenquoio  
 ictsiandac. <sup>6</sup> Mibi icsaid ěnquin chiombi. Nēbi  
 mimbi naid utsitsen isash bēdambo iccobi. Mibi  
 cuēdēnacno puduedshun nicodaitabon mibi  
 icsamenuen icsamboen chuisho tantiashun:  
 ‘Aido icsamboshē iquec,’ mimbi caoc. Adembidi  
 aido bēdamboen istiapimbo icoaibi. <sup>7</sup> Nēbi  
 ěbi tantiaquido utsibo chuinu. Ěmbi Epeso  
 yacnocquido chuibocpadomboen con Mayanēn  
 mibitsen tantiametsiashe. Pabiate cuembo icquin  
 ěmbi chiaid tantiata. Satanasēn: ‘Icsamenu,’  
 caqui chieshtoenquoio icquin ěbi tantiasho

Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniäcimbocnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata —quequin Esusèn chuiposhi.

*Esmidina yacnocquido Esusèn chiaid*

<sup>8</sup> Adshumbic Esusèn padpiden chuioaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmënquidon unës uacsho chococaqui uincuempaccondash. Adondaaid yec unësaid uincuemequidquo nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu. <sup>9</sup> Ëbi tantiaquido icsho utsibon chieshënac mimbi dayun uaid nibëdquiendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmënquidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasën yuaboen nec. <sup>10</sup> Aido tantiash: ‘Ashibi mëyampatsiash,’ quec dacuëdenda. Satanasën: ‘¿Ada Esus tantiaquido chieshtoenquo ictsiashe? Tanu,’ quequin namiäcpadomboen chieshëmënquidon mibi utsi-utsien quënën

nauedbanendac. Adoac daëdpactsëc ushec mibi mëyadendac. Pduenabi yec chieshtoenda. Chieshëmënquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. <sup>11</sup> Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquo icquin ëbi tantiasho isun icsaido cuidquiacno nësecainquo iquendambi,” quequin ëmbi chuiboed dada uata —quequin chuiposhi Esusèn.

*Pedcamo yacnocquido Esusèn chiaid*

<sup>12</sup> Adoshombic ana shëcuënuësh chështe cuënumboshë icquid cueshqueboedën Esusèn naden chuoaposhi. —Pedcamo yacnocquidon ëbi tantiaquidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu. <sup>13</sup> Mibi yacno Satanasën yuabo dadpen icnuc ëbi tantiec mibi chieshtoenquo iquec. Ënden Satanasën namiac mibi yacnoshon chieshëmënquidon con yua Antipas caid cuesunepondash. Aidën chieshtoenquo icquin ëmbi naid chuibansho cuesuniacsho isumbic adembidi chieshtoenquo icquin mimbi ëbi tantiaquiopondac. Aden mimbi bëdamboen naid tantiambi.

<sup>14</sup> Adondaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë



matses utsibo chuiquid dapa Badac caidèn: 'Isadaidbo aquec cho,' cac comapenen tantiaquidèn Badan caidèn isadaidbo Nuquin Papan chiaid niacmenuequin chuitampampic. Aidèn chiacpadomboen Badac caidèn matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nèish pichicaid pebededacno buampampic. Aden Nuquin Papan chiaid niac-niacmec icsamianquido mibèd iquec. Aido cuemepatecnèdan mimbi. <sup>15</sup> Adec nicadaitabo caido èbi tantiate shubun puduedash mibèdi cuèdèncuededec icsamiente bumpec. <sup>16</sup> Aidon chiaid tantienda. Èmbi chiaid mibi niac-niacmenushe. Aidobèd tabadènda. Mibi cuèdèncuededacno chomenda. Èmbi chuiboed niacbidansho isun con ana shècuènuèsh cueshqueboedèn chèshten cuesacbimboen mibi cuidtsiambique. <sup>17</sup> Nèbi èbi tantiaquido utsibotsen chuinu. Èmbi Pedcamo yacnocquido chuibocpadomboembidi con Mayanèn mibitsen tantiametsiashe. Pabiate cuembo icquin èmbi chuiboed tantiata. Chieshtoenquio icquin èbi tantiasho bèdambo icmendambi. Nuquin Papan isadaidbo mana caid pemedenequin dayun uacpadomboen mibi bèdamboen tabadmendambi. Adshumbic: 'Èmbi tantiaidquido yec èbi yacno puduedtequid nec,' queshun cuènote ushu menendambi. Abi cuèmèdquid icnubi utsi uain cuènquin aid cuènoten dada uatanquin menendambi. 'Èmbi meneboedènuidtsèqui ma isnu,' quequin adoendambi," quequin èmbi

Pedcamo yacnocquido chuiboed dada uata —  
quequin chuiposhi Esusën.

*Tiatida yacnocquido Esusën chiaid*

18 Adoshombic aidëmbidi padpiden  
chuoaposhi. Cuëte isquidbimboec aton ëshë  
isquid-isquidquio yequi aton taë shocosh  
piubimboec nac-nacpambo icposh. —Icsaisambo  
yec Nuquin Papan Madombo nec. Adquid yec  
abitedishun naid tantiaquidquio icquin matses  
cuidquidquio nec —camenuc adquio isadquidën  
naden chuiposhi. —Tiatida yacnocquidon ëbi  
tantiaquidon iste ëmbi naden chuiboed dada  
uata. 19 “Tantia, Tiatida yacnocquido. Mibitedi  
chuinu. Mimbi naid abitedi tantiembi. Ëbi  
tantiaquin mimbi utsibotsen bëdamboen tantiec.  
'Aton Papabëdtan Esusën bëdamboenshë natsiash,'  
quequin chieshtoenquio icquin mimbi ëbi  
tantiec. Adquid icquin ëbi tantiamenuen utsibo  
nashunquido mibi nec. Ëbi tantiesabon: 'Padi.  
Esus tantienda,' caqui mimbi chieshtoenquio  
icquin ëbi tantiapec. Tauamboen ëbi tantiaquin  
daëdpactsëc naondaïdi nëbi ëbi tantiaquioshon  
ëmbi chiacpadomboen mimbi dadpen naic.

20 Adec utsi-utsiec bëdambo icnubi icsamianquid  
chido abi iquec. Aid mimbi cuemepatecnëdan.  
Aid cuemenquio yec mibitedi icsaic. Mimbi  
cacumiabi mibi iccuededacno isadaïdbo  
tsusedpan chido Esabed caïdbimboecquid chido  
icsamboshë icquid muanuec puduedposh.  
Puduedshumbic: 'Nuquin Papan chiaid  
chuiquid nebique. Tantia. Chuinu,' quequin  
abi bunaiduidquio chuibanosh. Adoac ëbi

bèdiactsëc tantiauidtsëcboedi aidën chiacpadec icsacuededposh. Nuquin Papapenquoio utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuededquimbi aton chidopenquoio chudbededposh. <sup>21</sup> Adsho isun aid chido: ‘Ma abi icsaid ënu,’ queshun badedquoio cuidenquoio iccombi. Adoboqui abi icsaid ënte bunenquoio iccosh. <sup>22</sup> Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquoio ictsiac. <sup>23</sup> Aid chido cuidquoiquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: ‘Matsesën otacquoio tantiaid tantiaquidquoio Esus nec. Adquid icquin abi icsaid ënenquoio icquido cuidquin abi tantiaquido bëdambo icmendac,’ quequin tantiatsiash.

<sup>24</sup> Tantia. Ambocquido ëbi tantiaquidombotsen chuinu. Aden Satanasën chuimiaiðen chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquoio iquembi. <sup>25</sup> Nëiduidtsëqui chuinu. Mimbi bëdamboen nabocpadomboen chieshtoenquoio icquin ëbi tantiata. Ëbi choabi yacpadembi adota. <sup>26</sup> Choshombimbi chieshtoenquoio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. <sup>27</sup> Aden Nuquin Papan aido ëbëdta chuiquid dapa

icmiacsho utsibon: ‘Dëniacquin ëmbiquen nanu,’ catiapimbo iquendac. Èbi chieshënquido: ‘Esus dëniacquin ëmbiquen matses namenu,’ quesho tantiashun matsu nacnenquidën ambi nacnenaid icsambo icsho isun pos-posac bimboen cuidquiendambi. <sup>28</sup> Badiadte anoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi. <sup>29</sup> Èbi tantiaquido utsibotsen chuinu. Èmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiaata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusèn.

### 3

#### *Sadis yacnocquido Esusèn chiaid*

<sup>1</sup> Adoshombic Nuquin Papan Mayan abi tantiaquidobëd tabadmequidquio icquin Esusèn padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësac bimboen mimbi ëbi bëdamboen tantienquio iquec. <sup>2</sup> Isucunac bimboen ëbi padpiden tantiaquiota. Nuquin Papan chiacpadomboen mimbi nauidsëccoque.

Mimbi ëbi tantienquo iqueque. ‘Nuquin Papan chiacpadquiec bédamboec tabadnuna. Esus tantiaquionona,’ cananta. <sup>3</sup> Mimbi ëbi tantiabenondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenquo yacimboen ëbi tantienquo icshoembi mibi cuidendac. ‘Ampequid choec,’ quequin tantienquo yacimboen ëmbi cuidte tantienquo icsho mibi cuidtsiambique. Ëbi tantiaquiota.

<sup>4</sup> Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacimboec icsainquo yec bédamboec tabadec. Adec bëchish ucudacimboec abi icsaid ënash bédamboec tabadsho isun ëbëdi tabadmequin icsaisa icmendambi. <sup>5</sup> Ëbi tantiaquido utsibotsen chuinu. Ëmbi chuibocpadquidën chieshtoenquo icquin ëbi tantiasho adembidi bédamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoen-dambi Nuquin Papan abi yacnoshon uaido mayan bédabontsen tantianuc. Aden dada uaid ucudenquo yacimboen bëshunenquo icquin ëbëdi tabadtequido abitedi tantiembi. <sup>6</sup> Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiate cuembo icquin bédamboen tantiata. Chieshtoenquo icquin ëbi tantiasho adembidi bédambo icmendambi,” quequin ëmbi chuiboed dada uata —quequin Esusèn chuiposhi.

*Pidadepia yacnocquido Esusën chiaid*

<sup>7</sup> Adoshombic icsaisambo icquin ambi chiacpadomboen naquidënquio Esusën padpiden chuiposhi. Con tsusedpa Dabid yampicpadquid matses namequidquio yec ambentsëqui Nuquin Papa yacno puduedmequid nec utsibon: — Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata. <sup>8</sup> “Tantia, Pidadepia yacnocquido. Mibitedi chuinu. Mimbi naid tantiembi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquio icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquio mibi iccoc. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. <sup>9</sup> Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. <sup>10</sup> Ëmbi chiacpadec chieshtoenquio icquin ëbi tantisho isash mibi cudasendabi. ‘¿Ada Esus tantienquio yantsiashe? Tanu,’ queshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquio icquid icmendambi.

<sup>11</sup> Tantia. Nëbi choendabi. Utsibon chieshënaqui

mibi icbocpadquiech chieshtoenquio yec bëdamboec tabadta. ‘Ëbi adenquio icsho isun Esusën abi yacno puduedmenquio ictsiashi,’ quiash bëdamboec tabadta. <sup>12</sup> Aden chieshtoenquio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacbimboecnuc con shubun icquido mibi icmendambi auëshquio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adembidi abitedi ismequin: ‘Con Pabëdtan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. <sup>13</sup> Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiaata. Chieshtoenquio icquin ëbi tantiashe adembidi bëdambo icmendambi,” quequin ëmbi chuiboed dada uata —quequin Esusën chuiposhi.

### *Daudiseya yacnocquido Esusën chiaid*

<sup>14</sup> Adoshombic abitedishun naid tantiaquin abimbo chuiquidënquio Esusën padpiden chuioaposhi. Nidaidbëdta abitedi uaquidënquio abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. <sup>15</sup> Mimbi naid tantiembi. Chieshtoenquio icquin ëbi

tantiaquid ictiadquidi adquidpenquo mibi nec. ¿Ëbi bédamboen tantiaquidon adopendactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: ‘Dayacquio yacimboen ëbi tantiaquiopashun,’ caimbi mibi. <sup>16</sup> Mibi adec chieshtonoc ëbitsen chieshtotiadquo iquebi. ‘Cacumiacbimboen Nuquin Papa yacno ëbëdi mibi tabadmenquo iquendambi,’ mibi catiadquo icchitebi. <sup>17</sup> ‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabéd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubiuatiadquo iquebi. Bëchish ucabi yacimboen mibi icsaid ënabi icsho mibi bédamboen istiapimbo iquebi. Pacuënëdacbimboen ëbi tantienquo mimbi iquec. <sup>18</sup> Adboedëmbi Nuquin Papabéd tabadte bunquin ëbi tantiaquiota. Ëbi tantiaquin bëchish ucacbimboen mibi icsaid ënta. Adsho icsaisabimboecnuc mibi bédamboen isquin ëbëdi tabadtequid icmetsiambique. Pacuënëdaid paposhquiacbimboecnuc ëmbi naid mibi bédamboen tantiametsiambique. Ëbi tantiata.

<sup>19</sup> Ëmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuë ëmiacbimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash



bëdamboec tabadta. <sup>20</sup> Mibi tantiaquiembique. ‘Ëbi tantiata,’ ëmbi cac mibi: ‘Ai,’ quesho tantiash mibëd iquendabi. Pec tabadec bëisnaniacimboec mibëd iquendabi. <sup>21</sup> Tantia. Ëbi tantiaquido utsibotsen chuinu. Chieshtoenquoio icquin Nuquin Papan chiaidtedi naquin nainash aibdëdi tabadquid nebi. Adquid yec aibdëdi abitedishun Icbombo nebi. Adembidi ëmbi con Pan chiaid nacpadec chieshtoenquoio yec ëbi tantiec tabadsho ëbëdi tabadmequin ëbëdtan chuiquid icmendambi. <sup>22</sup> Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquoio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusèn.

## 4

### *Nuquin Papa Uanën isaid*

<sup>1</sup> Asia yacnocquido Esusèn ëmbudquin chuibon abuc ispombi. Adshun isquien shëcuë shëcniacimboec isadpec. Adnubien chuibocpadquiec shoncacimboec comapenec onqueoaposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.

<sup>2</sup> Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquoio tsadpec. <sup>3</sup> —Chuiquid dapa

abentsëcquiobi nec. Bëdamboshë iquec — camenuc matses bunaidquio casëdubimboec nac-nacquio yec piumbo yec bëdamboshë isadposh. Abi tsadaid nënantanquio uenquebudpamboec uen podquedbipamboec umu-umupambo icposh. —Bëdamboshë icquidquio nec —camenuc adquio icposh. <sup>4</sup> Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquio dasiuidcuededposh. Chuiquid dapan mauetempo shocosh nacnenaidquio maucuededposh. <sup>5</sup> Adnubien Nuquin Papa yacnuësh abubimboec bed-bedquetanenubien abu tesquianiacbimboec cuëdtoposh. — Abitedishun Icbombo nec —camenuc adec cuëdtoposh. Nuquin Papan bëntsiaucquio tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic —camenuc aden ismeposhi. <sup>6</sup> Bëntsiaucbidi actepenquio chian dapa acte-actectsëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquio. Abimboudquio istequidquio icposh. Cachoc icnubi tacbiduc adquiobidi icposh. <sup>7</sup> Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Ut-

sibic chiqui dapabimboec isadposh. <sup>8</sup> Icho-  
icboec aton podo uicchunèn podobimboec 6tedi  
icposh. Podonotsen adquiobidi èshëuidquoio isad-  
posh. Podo ananquoio adquiobidi icposh. Aidon-  
quiobi ènenquoio icquin Nuquin Papa chuiposh  
nadec cuèdènquin.

—Icsaisambo yec bédamboshë icquidquoio mibi  
nec.

Abitedishun Icbombo mibi icnuc mibipadquid  
utsi nibèdec.

Abitedimbo tantiaquidquoio mibi icnuc mimbi  
tantiacmaid nibèdec.

Matses uabi yec icpampidi mibi nec. Nèbi adquid  
yec mibi nibèdantiapimbo icquidquoio nec

—quec badiadquidèn badiadquidènqueic  
cuèdènashic inchëshèntsen cuèdèndeneposh.

<sup>9</sup> Aden dadanobi èshëcquidon: —Mimbi nac  
bèdambo iquebi. Mibi bédamboshë iquec, Papa.  
Abitedishun adembidi: “Bèdambo iquec,” mibi  
cac bèdambo ictsiash, Papa —Nuquin Papa  
cadonenubi <sup>10</sup> tsusiobo 24ted icquido ambo  
tabadquido danëshèn tinquebudcuededposh.  
Adtanquimbi mauete chicbededtanquin  
Nuquin Papan tayun sambededposh: —  
Abitedishun Icbombo mibiuidtsëqui nec —  
quequin. Adotanquimbic aidontsen Nuquin Papa  
chuiposh nadec cuèdènquin.

<sup>11</sup>—Mibi bédamboshë iquec, Papa. Adembidi abite-  
dishun mibi: “Bèdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibèdec.

Nadatiambo icquidquoio mibi nec.

Comapenen tantiaquidquio icquin mimbi abited-  
imbo uapampic.

Mimbi tantiacpadomboen mimbiuidtsēcquiobi  
abitedi uapampic.

Adoac mimbi tantiacpadequi mimbi uaido  
nibëdanabi yec abi iquec.

—quec tsusiobo cuëdëncuededposh.

## 5

*Nuquin Papan chiacpadomboen namequid Esus  
isadaid*

<sup>1</sup> Adshun isquien Nuquin Papan abiucshun  
ambi chiaid dada uaid sanampec. Abiuc  
daëdi dada uaid bidicabanquin: —Istemaïdën  
isnushe —queshun 7ted icnuc bitaccatempin  
bitaccabanaid neposh.

<sup>2</sup> Adnubien Nuquin  
Papan abi yacnoshon uaid mayan bëda chuiquid  
dapa comapenec onqueposh. —¿Tsuntsin nëid  
dada uaid bedshun bitaccaid chicbanquin  
chuibampatsiash? —quedo-quedoposh. —

¿Tsuntsin Nuquin Papan chiaid bedshun isquin  
ambi chiacpadomboen naquin naimepatsiashba?  
—quequin tantiec adposh.

<sup>3</sup> Adoaquien  
ëcbedanenquio icposh abitedimbo. Nëidic Nuquin  
Papabëd tabadquidotedi. Nëidic nidaidën  
tabadquidotedi. Nëidic unësaidotedi. Aidtedi  
dada uaid bedshun bitaccaid chicbanquin  
istequid nibëdposh.

<sup>4</sup> Adsho isashini unësquio  
icnuc shubipoc: —Aid dada uaid bedshun  
chicbanquin chuibanquid nibëdec —quiash.

<sup>5</sup> Adshobini anocquid tsusion: —Otac. Shubienda.  
Ënëd. Is. Dada uaid bedshun chicbanquin

chuiبانquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

6 Adoac isquien isadaidbon Nuquin Papa cuidmenquio icnuc abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunec abided cuidadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëtsëc tsusiobuidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbo aitededquiobidi icposh. — Abitedishun Icbombo yec utsin dëniacadiapimbo icquid Esusquio nec —camenuc aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec —camenuc ëshë 7tedi ismeposhi ushquin isacbimboecnuc. 7 Adshumbic obecabimboec isadboedën Esusèn Nuquin Papan abiucshunquio sananaid dada uaid bedposh. 8 Bedsho istanequien dadanobi ëshëcquidobëd tsusiobo 24ted icquido Esus ismec danëshën tinquebudcuededposh. —Bëdamboshë icquidquio mibi nec —quiash adcuededposh.

Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi ten-tencamequin Nuquin Papa cuishoncamiac bimboec Èsus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidac bimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. <sup>9</sup> Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquo icnuec mibided ciudadec unësondaidquo mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquo mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquo.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

<sup>10</sup> Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadèn nidaidënuësh mibëdtan  
chuiquid iquendac

—quec cuëdëncuededposh tsusiobo.

<sup>11</sup> Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidouidquio dacuenadec tabadposh. Abi uquëctsëc dacuenadec tsusiobouidquio tabadposh. Aid uquëctsëc dacuenadequic mayan bëdabouidquio tabadposh. <sup>12</sup> Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidacbimboec matses icsaid bedshunuec abided cuidadec Esus unëspondash.

Esusquio bëdamboshë icquidquio nec.

Adquid icsho: “Abitedishun Icbo icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bëdamboshë iquéc. Mibi tantiaquiemi,” abitedishun capashun

—quec cuëdëncuededposh mayan bëdabo Esus tantiec.

<sup>13</sup> Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid

uincuemiaidotedi yec acten icquidotedi yec quec  
cuëdëncuededposh naden chiec.

—“Abitedishun Icbombo yec tsadte dapan  
tsadquidquio Nuquin Papa bëdamboshë  
iquec.

Obeca bacuëbimboecquid abided cuidadec unësaid  
Esustsen bëdamboshë iquec,” canuna,  
ënenquio icquin.

“Abiuidtsëqui Nuquin Icho nec. Utsi adquid icti-  
apimbo iquec.

Aidën nac nuqui bëdamboshë iquec.

Abipadquid utsi nibëdec,” canuna ënenquio icquin  
—quec cuëdëncuededposh abitedimbo.

<sup>14</sup> Adsho tantiash dadanobi ëshëcquido: —Ai,  
abimbo caic —quenubi tsusiobo 24ted icquido:  
—Nuquin Icho bëdamboshë iqueque. Ismenu —  
quetanec Nuquin Papabëdta Esus ismec danëshën  
tinquebudcuededposh.

## 6

### *Bitaccaid chicaid chiaid*

<sup>1</sup> Adnubien Esusën Nuquin Papan: —  
Nadoendambi —quequin chiaid dada  
uaid 7tedi bitaccaid tauamboen abentsëc  
chicposh chicabi icquid 6tedi icnuc. Aid  
chicnubien Nuquin Papabëd icquid dadanobi  
ëshëcquidën abentsëcshun abu cuëdacbimboec  
comapenec cuëdquin: —Cho —caposh. <sup>2</sup> Adoac  
cabayo ushumbo icquid catsadec dada canti  
sanampamboec chosho ispombi. Adec chosho  
isun: —Mibi chieshënquido uesquin cuesun  
secaquidquio mibi nec —quetanquin chuiquid



dapan mauetempo mauemeposh. Adoac adecbidi abi chieshënquido cuesun secanuec nidposh.

<sup>3</sup> Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: — Cho —cac <sup>4</sup> cabayo piumbo icquid catsadec dada choposh. —Matses cuesun secananenquio icsho Nuquin Papan tantiapadomboen aidën nac matses abitedimbo matses utsibobëd cuesun secanandac —qeshun chështe dapa matses siante dapa meneposh. Adomboen Nuquin Papan matses cuidte tantiameposhi.

<sup>5</sup> Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. <sup>6</sup> Adnubien dadanobi ëshëcquido dacuenadec tabadnuc nënantanshunquio Nuquin Papan cabayo chëshëmbo icquid catsadquid chuiposh. —Piucquid dadpenquio meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquio icquin nata —quequin chuiposh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

<sup>7</sup> Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen

ënquimbi chuiquin: —Cho —cac<sup>8</sup> cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

<sup>9</sup> Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicanubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquio icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. <sup>10</sup> Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquio mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ¿tedectsicshun mimbi cuidpe? —caquin chuidoneposh. <sup>11</sup> Adoaquien: —Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedichieshëmënquidon ma cuesun secabono. Adoacsho isun cuesun secanquido cuidendambi —quesposh. Adshumbic Nuquin Papan: —Ëbëdi tabadmequin icsaisa mibi icmembimbi —queshun

abitiombi dasiuidbudte ushumbo icquid dasiuimbamposh.

<sup>12</sup> Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uedëqueposh. Nidaid uedëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh. <sup>13</sup> Uispabic natiambo cunquenec cuëte bacuë tididiquiacimboec nidaidën tididieposh. <sup>14</sup> Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. <sup>15</sup> Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. <sup>16</sup> Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusëntsen cuidnushe. <sup>17</sup> Aidon ambi

tantiacpadënquiobini nëbimbobi cuidchitec. Padtembo. ¿Tsutsi cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

## 7

### *Isadaidbo Nuquin Papa tantiaquidombo bësiaid*

<sup>1</sup> Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquo icposh. —Nuquin Papa: “Ma cunquequidën icsa uabanu,” quíabi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. <sup>2</sup> Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. <sup>3</sup> —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

<sup>4</sup> Adshumbic ambi bësebamboed tambanquin chuibamposh. —Bëseboedtedi Acobo caidën

madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. <sup>5</sup> Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. <sup>6</sup> Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. <sup>7</sup> Nëidic Acobon madobidi Simeyon caidën matses tsyuecquido aidtedquiobidi. Nëidic Acobon madobidi Debi caidën matses tsyuecquido aidtedquiobidi. Nëidic Acobon madobidi Isacad caidën matses tsyuecquido aidtedquiobidi. <sup>8</sup> Nëidic Acobon madobidi Sabadon caidën matses tsyuecquido aidtedquiobidi. Nëidic Acobon madobidi Ose caidën matses tsyuecquido aidtedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. — Adquido iquendac —quequin adoposhi.

*Esus tantiaquido Nuquin Papa yacno tabadaid*

<sup>9</sup> Aden Nuquin Papa tantiaquido bëseboedo 144,000tedi tambanquin ismëboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquëc. Nëidic

nidaid utsi-utsiec yacno tabadquido. Nèidic matses utsibo. Nèidic matsesquio. Aidededi Esus tantiaquido neposh. Nuquin Papa Esusbèd tabadacnombo tabadposh. Abèdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesèn chuiquid dapa ismiacbimboen: —Nuquin Papa bèdamboshè iqueque. Ismenu —quequin niste podobiecquid sananquin uic-uiccaposh. <sup>10</sup> Aido comapenec cuèdèncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuèded cuidacbimboen aton Mado Esuseded cuidpanèdash.

Adoac nuqui icsaid bedshunuec abided cuidadec unèspendash Esus.

Aid tantiasho icsaido cuidacno nidmenquio icquin nuqui abèdi tabadmec.

Aton Papabèd bèdamboshè iquec

—quec cuèdèncuededposh.

<sup>11</sup> Adsho tantiash ambo tabadquido mayan bèdabotedi danèshèn tinquebudcuededposh. —Nuquin Papabèd Esus abided cuidadaid bèdamboshè iqueque. Ismenuna —quiash adposh. Nènantanquio Nuquin Papabèd Esus tabadnuc abi uquèctsèc dacuenadec dadanobi èshècquido 4tedi icquiduidquio tabadposh. Abi uquèctsèc dacuenadec tsusiobo 24tedi icquiduidquio tabadnuc abi uquèctsèc dacuenadequic mayan bèdabouidquio tabadposh. <sup>12</sup> Aid mayan bèdabotedi danèshèn tinquebudcuededequi comapenec cuèdèncuededposh.

—Aden abi tantiaquido abëdi tabadmequid  
bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec,  
Papa,” quequin chuipashun.

Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquio icnuc ambi tantiac-  
maid utsi nibëdec.

Aiduidtsëqui bëdamboen tantiaquidquio nec.

Aidën nashunac bëdamboshë iquebi.

Nadatiambo icquid nec. Abitedishun Icbombo  
nec.

“Esusbëd Nuquin Papa bëdamboshë iquec,” ca-  
nuna

—quecuededposh mayan bëdabotedi.

<sup>13</sup> Adshumbic ëmbi 24ted icquid isboed  
abentsëcshun tsusion chuiposhi. —Ma ushumbo  
icquid abitiombi dasiuidquido ¿tsutsi nepec?  
¿Mitsiuëshquio aido chosh? —cac: <sup>14</sup> —Tsaudi,  
tsusio. Mimbibien tantiec —capombi. Adsho  
tantiash: —Tantia. Mibi chuinu. Satanasën:  
“¿Ada chieshtoenquio ictsiashe? Tanu,” qeshun  
natiamboshë icmiac Esus tantiec chieshtoenquio  
ictenedo nec. Adec chieshtoenquio icsho isun  
Satanasën tantiacpadomboen chieshëmëncquidon  
unës uapondash. Abided cuidadec unësaid Esus  
tantiaquido icsho icsaisa icmiaido yec dashcute  
ushumbo icquid dasiuidcuededposh. <sup>15</sup> Esus  
tantiaquido icsho Nuquin Papan abi yacnombo  
puduedmeshun aton yuabo icmepondash.  
Adoac Nuquin Papa yacnombo tabadquimbi  
abi ënenquio icquin tantiendac. Adembidi  
Nuquin Papan: “Con mado mibi nec. Con

champi mibi nec. Nuquibi icnu. Cho,” qeshun abèdi tabadmequin bédamboen dayun uaic. 16-17 Isadaidbo matsesèn nèish yua obeca dadpen dayun uacpaden abided cuidadec unèsaidèn Esusèn abi tantiaquido bédamboenshè dayun uaindac padpidec unèstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuèsh ushèn pichiquenquio iquendac. Chun mèyadenquio iquendac. Nidaidènuèsh shubidenedi Nuquin Papa yacnuèsh shubitiapimbo iquendac. Natiamiante nibèdquiec iquendac. Unèsquio icmiente nibèdquiec iquendac. Bacuè shubisho anin bëucquin bédambo icmiacimboen abi yacnoshon Nuquin Papan Esus tantiaquido bédambouidquio icmendac — quequin chuibamposhi tsusion.

## 8

### *Dada uaid bitaccaid nainquin chicaid*

<sup>1</sup> Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin Papa yacnuèsh nadimbo icposh. — Dacuèdampambo iquec —quec media oda yec yuec-yuecpactsèc otacquo tantiec tabadposh. <sup>2</sup> Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adshò isun icbo-icboen shoncate sietetedi menebamposh. <sup>3</sup> Adnubien mayan bèda utsi ambobidi choposh. Choash bédambo nuadquid tauinuequin shocosh nacnenaaid tauite dapa dayun nidtuidposh. Shocoshèmpin



bèdamboshë nuadnuc tauitempi utsi sanamposh. Adsho isun bèdambo nuadquid nua meneposh. Adoac: —Nëid tauiac pushudquid Nuquin Papa yacno nidac bimboec Esus tantiaquidon chianiaid iquec —quequin bèdambo nuadquid sanshun tauite nacnenaid dapan tauiposh bèdambo nuadnuc. <sup>4</sup> Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantishun Nuquin Papan abi tantiaquido chieshënquido cuidendac —quequin aden ismeposhi. <sup>5</sup> Adshumbic aid mayan bèdan tauite dapan samèdquid cuëte dëtsisadaid isquidquio icquid bedshun shocoshëmpin sandoposh. Aden sandotanguimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bedbedquetanepamboec abu tesquianiabimboec cuèdtoposh. Adnubien nidaid abichobi saccasacquamboec uèdëqueposh. —“Nuquin Papan ëbi chieshënquido cuidpashun,” quequin Esus tantiaquidon chianesho tantishun aden Nuquin Papan comapenen cuidendac —quequin aden ismeposhi.

### *Shoncate shoncaquin ismiaid*

<sup>6</sup> Matses tabadacno cuëte dëtsisadaid isquidquio icquid masiabudnubien shoncate bedboedon mayan bèdabon shoncanuen sanamposh. <sup>7</sup> Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid

yec intac yec quenuc chomeposh ue dapa choachimboecnuc. Aden chomiaidèn nidaid nuamboshë taidposh. Cuëte dadpenquioshë taidposh. Uasin dadpenquioshë pichiqueposh.

<sup>8</sup> Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. <sup>9</sup> Adec intac yanaidèn acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

<sup>10</sup> Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën- nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. <sup>11</sup> Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

<sup>12</sup> Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactsëcquio chënquiansëccosh.

<sup>13</sup> —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësqioshë iquéc. Shoncabi icboedon mayan

bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

## 9

### *Mayan bëda utsin shoncanuc isaid*

<sup>1</sup> Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papan yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempï meneposh. Podobitsi icsabo uidën uacno nidaid shëcuë uquëducquio icquid bëtashte chicte neposh. <sup>2</sup> Aid chictempin chicaquien uquëducuësh tied nëdënquedoachipamboec pushudtoposh. Abuc inchëshquio pushudquid icnuc ushë isadenquio icposh. <sup>3</sup> Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh. <sup>4</sup> Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquidoidquio sebudneta —quequin chuiposh. <sup>5</sup> Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. <sup>6</sup> Aid tsectsebiecquidën siac

natiamboshë yec matses unëste bunquiendac. Unëste bunquidi badedi unësenquo iquendac.

<sup>7</sup> Aden tsectsecbiecquid ismeposhi. ¿Mitsipadquo nidaid cudasquid sondado catsadaid cabayo icpec? Adquo cabayobimboec tsectsecbiecquid isadposh. Shocosh mauetebimboecquid mauecuededposh. Matsesën bêtantetembobi bëisadposh. <sup>8</sup> Chidon tëbucshumbimboec isadposh. Bëdin shëtabimboec aton shëta icposh. <sup>9</sup> Bëntsiauc shicdiadquid cudaste shocosh nacnenaibimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. <sup>10</sup> Aid tsectsecbiecquid chishpichoquid yec chichumbimboec sianquidquo neposh. Inchëshën ushë 5tedi nidmequin adquidën dadpenshun natiamboshë icnuc matses sebudneposh. <sup>11</sup> Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquo nec —quequin isadaidbon onqueten abadon caposh. Quidieco matsesën onqueten apoyon caposh.

<sup>12</sup> —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

### *Chiqui dapan chuiboed utsi*

<sup>13</sup> Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiauc tsadunaid yacnuëshquo onquedoshon tantiombi. <sup>14</sup> Adec onquequidën nëbi shoncaboed chuiposh. —Acte dapa

Eupëdates caid yacnoshon matses cuidquido mayan bédabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. <sup>15</sup> Aden chuitanac aid mayan bédabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. <sup>16</sup> Adoaquien ambi namiaido cabayo catsadquido sondado chedo matses utsibo cuesun secanuec choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

<sup>17</sup> Ëmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadac bimboec asupede caid icsamboshë nuadposh. <sup>18</sup> Adshumbien ana shëcuënuësh choaidën matses dadpenquioshë cuesun secabudneposh. <sup>19</sup> Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidënsen matses dadpenquioshë unës uabudnequin ismeposhi.

<sup>20</sup> Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo

icposh. Ambi naiduidi nabamposh. Ëntiadquidi abi icsaquioposh. Nuquin Papa tantienquo icquin podobitsi icsabo tantiaquin ëntiapimbo icposh. Adembidi ambibi nacnenaïd ambi papa caïd ënenquo icquin tantiaposh. Utsibon shocosh nacnenaïd tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaïd anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacnenaïduidi tantiaposh. <sup>21</sup> Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquo chudquidombic adembi utsi chudshumbedposh. Adembidi aton bënëpenquo chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ëbi icsaid ënu —quetiadquidobi adenquo icposh.

## 10

### *Mayan bëdan dada uaidëmpi pemiaid*

<sup>1</sup> Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquo Nuquin Papa yacnuëshquo budsho ispombi. Abu ushubimboec isadec abitiombi dasiuidbudpacosh. Uen podqued uenquebudacbipamboec

mapino icposh. Ushëbimboec bêtantete  
 bëchamauanquiecposh. Buintad nitsinaid  
 nëdënquiacbipamboec isquid-isquidpambo nidte  
 icposh. <sup>2</sup> Dada uaidëmpi bëcadotsaid sanamposh.  
 Budash nidtuidposh. Tsiembudcuenshun taë  
 abiucshun chian dapa mad caid nëtıncaquimbi taë  
 opiocshon mananuc tincaposh. Ënapenquioshë  
 icquid niosh. <sup>3</sup> Adashien bëdi noshquiacbimboec  
 nuamboshë cuëdtoposh. Adec cuëdquin chiac abu  
 7tedec cuëdtonequin ëcbedtoneposh Nuquin Papan  
 chiaid chuiquin. <sup>4</sup> Aden abu cuëdquin ëcbedtonesho  
 tantiashun: —Abu cuëdquin chiaid dada uanu  
 —qeshobi: —Padi —caposhi Nuquin Papa  
 yacnoshon chuiquin. —Abu cuëdquin chiaidtedi  
 dada uainda. Padi. Utsibo chuiquin dada uainda  
 —caposhi. Adoac dada uainquio iccombi.

<sup>5</sup> Adnubien mayan bëda tsiembudcuenshun  
 chian dapa nëtıncaquin utsiucshun mananuc  
 tincaboedën ambibi podo abiucquio cadoposh.  
 —Nuquin Papan isnubi abimbo chuiquidquio  
 nebi —quequin tantiamenuen aden ambibi podo  
 abiucquio cadoposh. <sup>6</sup> Adotanquin chuiposhi.  
 —Tantia. Mibi chuinu. ¿Tsutsi nidaid uabi  
 yec ëndenquimboshë icpampic? Aidi Nuquin  
 Papa nëbi adquid yec nibëdantiapimbo iquendac.  
 Adquid icquin abitedi uapampic. Abu uashun  
 aidën icquidtedi uapampic. Nidaid uashun  
 aidën icquidtedi uapampic. Acte uashun aidën  
 icquidtedi uapampic. Aden abitedi uaquidën  
 chiaidquio chuinu. Nëbi Nuquin Papan ambi  
 tantiacpadomboen icsambo icquido cuidquimbi  
 abi tantiaquido abëdi tabadmendac. <sup>7</sup> Èbi padquid

mayan bëda utsin shoncate sanamboedën: “Nëbi nainquin shoncanu,” cacpadënquio Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

<sup>8</sup> Adnubini abucuësh cuëdquidën chuiposh. — Aid mayan bëdan sanamboed dada uaid bed — cac: <sup>9</sup>—Dada uaid beccho —capombi. Adoaquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuis-honquequin isban-isbanash mucambo yanacbimboec Nuquin Papan cuidte tantiash shubitiadquio mibi yanendac —quequin tantiamenuen aden chuiposhi.

<sup>10</sup> Adoac aid bedshun chiash adquio yanobi.

<sup>11</sup> Adquio yansho isun mayan bëdabo chuiquid dapan chuioaposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bëdabo chuiquid dapan.

## 11

### *Nuquin Papan namiaidon daëdshun naid*

<sup>1</sup> —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioaposhi. — Edusaden yacno nidshun Nuquin Papa tabadte



shubu uashunaid tambanta. Adotanquimbic Nuquin Papa tantiaquin bédambo nuadnuc tauinuequin nacnenaïd dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. <sup>2</sup> Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaïdpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” qeshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. — “Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaïdo tantiameposhi. <sup>3</sup> Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquio chuimendambi. “Nuquin Papan namiaïd nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuec dashcute icsactsëcquidquio dasiuidendac — quequin Nuquin Papan chuiposhi.

<sup>4</sup> Adshobini mayan bédan chuioaposh. — Aïdo Nuquin Papan oncamiaïd daëd isadaïdbo matses tsusedpan chuipampid nendac. “Nuquin Papan bëntsiauc cuëte odibos caïd nitsinaïd

daëd bēdambo icquid iquendac. Ambobidi tabote daëd bēdambo icquid iquendac,” quequin chuiampid nendac. “Nuquin Papan Mayanèn tantiamiaidquo icquin ambi chiaidquo chuibanendac,” camenuen aden chuiampic.  
<sup>5</sup> Aden abi chuibansho abi chieshēnquidēn: “Mibi cuesunenu,” caqui cuesuniadenquo iquendac. Nuquin Papan dayun uaid icquin ana shēcuēnuēsh choboedēn nibēdquiecnuc pichicacimboen abi cuesunenuequivotedi unēs uaindac. Nuquin Papan cuidte tantiamenuen adoendac. <sup>6</sup> Adembidi Nuquin Papan cuidte tantiamenuen Nuquin Papan Mayanèn namiaidquo icquin comapenen tantiaquin ismebanendac. Aden ismequin nac abi nidabi yacpadequi ue choenquo iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuēdampamboecquin matses shubimendac Nuquin Papan cuidte tantiamenuen.

<sup>7</sup> Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshē icquidēn bēdi dapabimboecquidēn abidaēdi cuesun secaindac. Satanasēn namiacpadomboen adoendac.  
<sup>8</sup> Edusaden yacnoshon cuesun secashun chococainquo iquendac. “Ma cuesun secaid ischitono,” queshun chococainquo icquin podqued ansanendac. Nuquin Icho Esus cuesten dectanacnoshonquo matsesēn adoendac. Equipito yacno icpampido yec Sodoma yacno icpampido yec quequidbimboec

icsamboshë icquin aden Nuquin Papan chiaid chuibanquido cuesun secaindac. <sup>9-10</sup> Aden cuesun secabosh: “Nuqui mëyanquid nëid daëd neque. Chococatiapimbo iquebi,” queshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiaish cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

<sup>11</sup> Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiasho isash cuishonqueboedobi natia dacuëdec tabadendac. <sup>12</sup> Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënuquidon isnubi adendac. <sup>13</sup> Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan. <sup>14</sup> Aden chiqui dapan chuibocpadomboen mayan bëdan Nuquin Papan

cuidte utsi chuiposhi. Nainquin chiabi iccoshi.  
Abi utsi iquec.

*Nainquin shoncaquin Uan ismiaid*

<sup>15</sup> Nuquin Papan uincuemetequido daëd chui-  
bombien mayan bēdan shoncate sanamboedēn  
nainquin shoncaposh. Shoncanubien Nuquin  
Papa yacnuēsh nua cuēdēncuededposh naden chiec.  
—Nuquin Papabēdi aton Mado Esuquidistu  
abided ciudadec unēsaid bēdamboshē iquec.  
Abi chieshēnquidon naid ēmeshun aid  
abentsēcshumbi matses abitedimbo  
namendac ēnenquo icquin.

Abitedishun Icho nec  
—quec cuēdēncuededposh. <sup>16</sup> Adashic Nuquin Papa  
yacnombo icbo-icboec tsadten tabadboedobi tsu-  
siobo 24tedi icquido: —Mibi bēdamboshē iquec —  
quequin ismec danēshēn tinquebudcuededposh.

<sup>17</sup> Adtanequi nadec cuēdēncuededposh.  
—Nidaid uabi yec ēndenquimboshē mibi icpampic,  
Papa.

Nēbi adquid yec nibēdantiapimbo icquid mibi nec.  
Abitedishun Icbombo mibi icnuc:  
“Ēmbiquen dēniacquin namenu,” Satanasēn cati-  
apimbo mibi iquec.

Nadatiambo icquid icquin mimbentsēqui matses  
abitedimbo mimbi namendac.

<sup>18</sup> Nidaid utsi-utsiec yacno tabadquidon abi chuiq-  
uidobēdtan mibi chieshēndenec.

Mimbi uaidtedi icsa uadenec.  
Adsho mimbi tantiacpadēnquo nēbi mimbi  
cuidendac.

Matses abitedi uincuemetanquin mimbi chiaid  
niac-niaquec icsaquido mimbi cuidendac.

Adoshombic mimbi chiaid chuibanquidobëdta  
 mibi tantiaquido abitedimbo mibi yacno  
 mibëdi mimbi tabadmendac.

Chuiquid dapambobëdta chuiquidpenquo mibi  
 tantiaquidotedi bëdambo icmequin mimbi  
 adoendac

—quequin tsusiobon Nuquin Papa chuisho tanti-  
 apombi ushquin isacimboen.

<sup>19</sup> Adshun isquien Nuquin Papa yacnombo  
 con matses isadaidbon Nuquin Papa tabadte  
 shubu uashunampid shëcniacchobi icposh. Aid  
 shubu nuntan isaquien Moisesën ambi nacnenaid  
 Nuquin Papan chiaid sandoampid icposh. —  
 Ëndenquimboshë ambi chiampicpadomboen  
 Nuquin Papan ambi tantiaidtedi nainquin  
 naindac —camenuen aden ismeposhi.  
 Aden ëbi ismenubien bed-bedquetanec abu  
 teshquianiacbimboec nua cuëdtoneposh. Nidaid  
 saca-sacaquemboec uëdëqueposh. Ue dapa  
 nuamboshë choachimboec ue tsasi choposh.  
 —Nuquin Papambo abitedishun Icbombo nec  
 —camenuen aden ismeposhi Nuquin Papa  
 yacnoshon.

## 12

### *Chidobëdta nisibimboecquid dapa ismiaid*

<sup>1</sup> Adoshombic Nuquin Papa yacnoshombidi  
 utsitsen dacuëdampamboecquidbidi ismeoaposhi.  
 Adoac chido ushë dasiuidacximboec  
 bëchamauanquiecscho ispombi. Inchëshën ushë  
 tincash tsadposh. Uispa 12tedi nacnenaid mauete  
 maueposh. <sup>2</sup> Bacuë nua usunec tishtiadtsëcquio  
 yec shubibud-shubibudposh. —Isadaidbon

chido Esus tishquid nec —camenuen aden ismeposhi. <sup>3</sup> Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecededposh. Satanas niosh. <sup>4</sup> Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo icboedo utsi-utsien yuapampic. Aden yuash aton yuabobëdi nidaidën choshon matsetsen icsamete bunquiec —camenuen aden ismeposhi. Adshumbic chidon tishacsho bacuë penuen auidi bëisquin cainuidposh. <sup>5</sup> Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. <sup>6</sup> Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

<sup>7</sup> Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo icboedobi Nuquin Papan chiaid

niac-niaquec icsash podobitsi icsabo yanaido Satanasèn yuaido. Nèidic Nuquin Papabèd icquidombo mayan bédabo dadpen. Nèidic aido chuiquid dapambo Miqued caid. Aidedi ispombi. Adnubien Satanash nadposh. —Aton yuabo mayan bédabo cuemiash Nuquin Papa dèniaquec èbimbo abitedishun icbo yantsiabi —quiash nicantiadquo icposh. Satanash chedo nidaidèn nidmiabi icnuc neposh.  
<sup>8</sup> Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidènquo icquido yec niadenquo icposh. Adshumbic Miqued chedon nisibimboecquid Satanash chedo nicaposh. Aton yuabobèdta Nuquin Papa yacnoshon nicaposh.  
<sup>9</sup> Nicaquien matses tabadacno nidaidèn choec Satanash chedo bud-budposh. Eba caid icsamepampid Satanash niosh. Nèbi matses dadpenquioshè icsamequin yuate bunquieci.

<sup>10</sup> Adnubien Nuquin Papa tabadacnoshon anocquidèn comapenec onquequin chuibamposh naden chuiquin.

—Aden Nuquin Papan aton Mado Esusbèdta abi dèniacnuequido dèniacmenquo icposh.

Nuquin Papa chieshènquidquo icquin abi tantiaquido chieshènquin icsamboen chuishunquid nec.

“¿Esus tantiaquido bédambo icquidoda nedic? Èmbi natiamiac aido chieshtotsiash,” quequin Nuquin Papa chuidenequid Satanash nec.

Satanash chedo cuemiash Nuquin Papa aton Mado Esus abided cuidadec unèsaidbèdi

dëniacdtiapimbo yec abitedishun Icbombo  
nec

—queposh Nuquin Papa yacnuësh cuëdec.

<sup>11</sup> Adashic padpidec auëshbidi:

—Nëbi ëmbi isac Satanasën Esus tantiaquido  
chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoen-  
quio icposh.

Cuidmenquio icnuec abided cuidadec unësaid  
Esus tantiec chieshtoenquio icposh.

Adsho abi chieshënquidon matsesën: “Padi. Esus  
tantienda. Cueschitomane,” caqui

chieshtoenquio icquin adenuidi Esus tantiasho  
cuesun secameposh Satanasën aton yua  
icmiambobi.

<sup>12</sup> Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuis-  
honquenuna.

Ëbitedi cuishonquenuc nidaidën tabadquido mat-  
ses yec mibi cuishonquetiapimbo iquec.

Nëshun cuemiac mibi yacno budash Nuquin Papa  
chieshënquieci Satanas chieshëmënquieci  
tabadec.

Mibi icsamete bunquieci. “Nëbi Nuquin Papan ëbi  
cuidquieque.

Abi tantiaquido yuashunchitono,” quec mibi ic-  
samete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden  
tantiameposhi.

<sup>13</sup> Adshumbic ëmbi isadaidbon chido isboed  
padpiden ismeposhi. Adoac Esus tishquid  
isadaidbon chido unës uanuen nadancasho



ispombi. —Nuquin Papa yacnoshon nicachitoshi —queshun chieshënquin nisibimboecquid Satanasën aid chido nadancaposh. <sup>14</sup> Adnubien Nuquin Papan chiqui dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh. <sup>15</sup> Adnubien nisibimboecquidën: —Aid chido unës uachitono —quequin ambibi ana shëcuënshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec. <sup>16</sup> Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. <sup>17-18</sup> Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

## 13

### *Bëdibimboecquid dapa ismiaid*

<sup>1</sup> Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi

icposh. —Nuquin Papa caid nibèdquiec. Èbiuidtsèqui abitedishun icbombo icnu —quequin aton mapitedi bédada uadaid neposh. Pais 10tedi icposh. Aid paistedi chuiquid dapan mauete paisèn dectambampaccosh. <sup>2</sup> Aton dada bédin dadabimboec isadposh. Aton taë uinsadpambo icquid utsi oso caidèn taëbimboec isadposh. Ana shècuë bēdi utsi tēbuchoquidèn ana shècuëbimboec icposh. Adsho isun Satanasèn ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasèn matses icsamboshē icquid chuiquid dapa icmequin ismeposhi. <sup>3</sup> Adshumbic padpiden ismeposhi. Adoac aid bēdi dapabimboecquid acte uquēducuēsh choboedèn mapi abentsēc mēmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —qeshun matses abitedishun acte uquēducuēsh choboedèn chuiquid icsamboshē icquidèn chiacpadomboenuidi nabededposh. <sup>4</sup> Adshumbic: —Èbi chuiquid dapa namequid mibi nec —quequin Satanas papa caquin matsesèn tantiabededposh. —Aden Satanasèn namiac èbi chuiquid dapapadquid utsi nibèdec. Comapenen tantiaquidquio icnuc utsibon nuqui cuesun secatiapimbo iquec —qeshun abi chuiquid dapa acte uquēducuēsh choboedtsen tantiaquioposh. <sup>5</sup> Aden matsesèn tantiaid icquin Satanasèn tantiamiacpadomboen Nuquin Papa chieshènquiec: —Nuquin Papa

caid nibëdquieç. Ëmbiuidtsëqui namembi — quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. <sup>6</sup> Aidën Nuquin Papa chieshënquin naden muauaposh. —Nuquin Papa caid nibëdquieç. Abi tabadaidtsen nibëdquieç. Abi yacno tabadquido abitedi nibëdquieç. Ambembi chiaid niosh —quec muaposh. <sup>7</sup> Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsieç yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacbimboecnuc ismeposhi. <sup>8</sup> Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

<sup>9</sup> Pabiate cuembo icquin bëdamboen tantia. Esus tantiaquido icsho mibi chuinu. <sup>10</sup> Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantiaash mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

*Nidaid shëcuënuësh choboedtsen ismiaid*

<sup>11</sup> Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. <sup>12</sup> Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. — Seshuniaid uincuemiondaidën nuqui chuiquid dapan chiaiduidtsëqui natiad —caposh. <sup>13</sup> Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh. <sup>14</sup> Aden Satanasën namiacpadomboen comapenen tantiaquin ismiac matses dadpenshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquio icquin. Abi chuiquid tantiamequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacentä —cac matsesën nacnemposh. <sup>15</sup> Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh.

Adoaquien nacnemboedquiobi chuiquid dapa icsabimboec onquequin: —Èbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. <sup>16</sup> Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquoio dada uaquin bësiadmeposh nëidtedi. Nëidic chuiquid dapabo. Nëidic chuiquidpenquoio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquoio. Aidtedi matses dadpenquioshë dada uaquin bësiadmeposh. Utsi-utsien bëtanteteno bësiadmeposh. Utsi-utsien mëdante abiucquoio mësiadmeposh. —Acte uguëducuësh choboedën èbi chuiquid dapan yuabo nec —queshun nameposh. <sup>17</sup> Adshumbic nidaid shëcuënuësh choboedën chuiposh. —Adec ëmbi chiacpadec siadambo icquido piucquidbëdta mitsana utsi menenda. Èmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh. <sup>18</sup> ¿Ada ëmbi chuiboed tantio? Bëdamboen tantiaquidën: —Abi cuëmëdquidquoio chienquoio icquin naden 666 chuiquin dada uapac —catsiash. —Adec matses icsamboshë icquidquoio chuiquid dapa yansho isun bëdambo icquid danenda —quequin ushquin isacbimboecnuc aden ismeposhi.

## 14

*Nuquin Papan cudasënaido ismiaid*

<sup>1</sup> Adoshombic padpiden ismiac abided cuidadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. <sup>2</sup> Adnubien Nuquin Papa yacnuësh ¿midapadpamboec cuëdtoposh? Acte nua chododoquiacbipamboequien niacbiposh. Abu tesquianiacbipamboequien nechitosh. Ten-tencate dapa dadpen icbo-icboen sananquin ten-tencacbipamboec comapenec cuëdëncuededposh. <sup>3</sup> Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdtan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. <sup>4</sup> Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh.

<sup>5</sup> Chieshtoenquo icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

*Mayan bëda utsi 3tedshun chiaid*

<sup>6</sup> Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacbimboec abuc cuensho ispombi. Bënuftiapimbo icquid Nuquin Papan chiaidquo matses chuinuec niosh nëidtedi. Nëidic matsesquo. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. <sup>7</sup> Abuc cuenquimbi chuibemposh. —Nuquin Papauidsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquo iquec,” quequin tantiata. Nëbi ambi chiaid niac-niacquido cuidquieque. Aidquo tantiata —quequin chuibemposh abuc cuenquimbi.

<sup>8</sup> Adnubien mayan bëda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacbimboen matses utsibo abitedi Nuquin Papa tantiamenquo icquin icsamequiosh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

<sup>9</sup> Adnubien mayan bëda utsitsen abuc cuenoaposh. Aidëntsen chuibenoaposh. —Tantia. Nuquin Papan cuidtequido chuinu. Chuiquid

dapa icsamboshë icquid acte uquëducuësh choboed tantiaquin aidbimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. <sup>10</sup> Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided ciudadec unësaid Esusënquio mayan bëdabobëdtan isnubi adoendac. <sup>11</sup> Ènenquio icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac ènenquio icquin —quequin chuibemposh mayan bëdan. Aden ismeposhi.

<sup>12</sup> Èmbi chuiboed tantiashun mimbi nabocpadomboembi chieshtoenquio icquin Esus tantiaquin ambi chiacpadomboenuidi nabanta. Ut-sibon chieshënquin: —Padi. Esus tantienda. Cueschitomane —caqui adenuidi ènenquio icquin Nuquin Papabëdta Esus tantiaquiota.

<sup>13</sup> Adnubi Nuquin Papa yacnuësh comapenec onquequin chuioaposhi. —Naden chuiquin dada uata. Chieshëmënuquidon: “Esus tantiec,” qeshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash



bëdamboshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboshë icmendac —quequin chuiposhi.

*Intac nua icnuc Nuquin Papan cuidtequid chiaid*

<sup>14</sup> Adoshombic padpiden ismiac abu ushunquio Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaïd maueshun chështebimboecquid sanamposh. <sup>15</sup> Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaïd butebanquin sando. Nuquin Papan tantiacpadën nëbimbobi nata <sup>16</sup> —caquien chështebimboecquidën sinaïd butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

<sup>17</sup> Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec. <sup>18</sup> Adec chështebimboecquid sanampamboec choshobien mayan bëda utsin matses tabadacno cuëte dëtsisadaïd isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caïd nidaidën caniquid chështebimboecquidën mëtebanquin sandoshon buanshun uba tish-tishten sando <sup>19-20</sup> —caquien uba caïd mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë

yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido chochomendac. Edusaden yacno cho-chomeshun ashunquio Nuquin Papan cuidac matsesèn intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesèn intac chëuëdsho isombi ushquin isachimboen. — Aden Nuquin Papan abi chieshënquido cuidendac —quequin ismeposhi.

## 15

### *Nuquin Papan cuidtequid 7tedbidi nabanaid*

<sup>1</sup> Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bëdabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac —quequin tantiaquin ispombi.

<sup>2</sup> Nuquin Papa yacnobidi chian dapa icposh. Actepenquio yec acte-actectsëcquio isadposh. —Nuquin Papa icsaquido cuidquidquio nec —camenuec tied nëdënquiabimboec aid bëntse isadposh. Aid cuëmambi Esus tantiaquido tabadposh. Satanasèn namiaidën acte uquëducuësh choboedën chuiquid

dapa icsamboshë icquidën: —Yuanu —  
cauidaido niosh. Chuiquid dapa icsamboshë  
icquidbimboecnuc nacnenaid tantiatipimbo  
icquido aido niosh. Adecbidi icsamboshë  
icquidën ancabudacpaden nainquio yec aton  
yuabo ictiapimbo yec aid cuëmëdaidbimboecquid  
666 dada uaquin siadmetiapimbo icquido niosh.  
Adec abi tantiaquido icsho Nuquin Papan  
meniaid ten-tencate cuëdëmec cuëdëncuededposh.  
<sup>3</sup> Nuquin Papan namiaid Moises: —Nuquin  
Papan nac ëbi chieshënquidon ëbi cuesun  
secainquio icposh —quec cuëdëmpampicpadec  
cuëdëncuededposh. Nuquin Papa bëdamboen  
ismenuec abided ciudadec unësaidquio Esus aton  
Papabëdta tantiec cuëdëncuededposh naden chiec.  
—Nadatiambo icquin nabanquidquio mibi nec,  
Papa.

Abitedimbo uaquidquio yec abitedishun Icbombo  
mibi nec, Papa.

Matsesën naid abitedi tantiaquidquio abimbo  
chuiquidquio mibi nec, Papa.

Mimbi naid bëdambo icnuc dacuëdampambo mibi  
iquec, Papa.

Nidaid utsi-utsiec yacno tabadquidon Icho icpam-  
pidi adecbidi matses abitedishun Icbombo  
mibi nec.

<sup>4</sup> Matses abitedishun: “Nuquin Icho  
dacuëdampambo icquid neque.

Ambi chiacpadomboen nanuna,” mibi capashun,  
Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido  
cuidquimbi bédambo icquido mimbi  
bédamboen isendac.

Adsho isun nidaid utsi-utsiec yacno tabadquidon  
matses abitedishun: “Mibi bédambo iquec.  
Con Icbombo mibi nec,” caindac  
—quec cuèdèncuededposh Esus tantiaquido.

<sup>5</sup> Adshun isquien isadaidbon: “Nuquin Papa  
tabadte nec,” quequin shubuampicpadquid  
shubu shècniacchobi icposh. Nuquin Papa  
tabadacnombo tantiamenuen aden ismeposhi.

<sup>6</sup> Auèshquio Nuquin Papan chiacpadec  
ëmbi isboedo mayan bédabo 7tedi cho-  
choposh. Matses icsaquido cuidquido niosh  
aido. —Nuquin Papan yuabombo nec —  
camenuec dashcute nac-nacquio icquid  
dasiuidcuededash dashcute bëshpiu-bëshpiumbo  
icquid shictonquecuededposh. <sup>7</sup> Adsho isun  
Nuquin Papabéd icquid dadanobi èshècquid  
abentsècshun maspanèmpi shocosh piu nacnenaid  
icbo-icboen menebamposh. Unèstiapimbo  
icquidèn Nuquin Papan nèishènquioshon cuidte  
cushtoaid maspanèmpi niosh. <sup>8</sup> Adnubien  
Nuquin Papa tabadaid nuntanuèsh pushud-  
pushudpambo icposh. Adec dacuèdampamboecsho  
isash Nuquin Papa chuinuec puduedtiapimbo  
icposh. Ènquin cuidambi padpidec Nuquin  
Papa yacno puduednushi niosh. —Abitedishun  
Icbombo yec dacuèdampambo icquidèn ambi  
tantiacpadomboen icsaquido uesquin cuidendac  
utsibon: “Chèn,” cadiapimbo icquin —camenuen  
aden ismeposhi.

## 16

### *Maspanëmpin cushtoaid*

<sup>1</sup> Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

<sup>2</sup> Adoaquien abentsëcshun ambi bedboed maspanëmpin cushtoaid nidaidënschun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiakin abibimboecnuc nacnenaaid tantiaquido yec aton icbo cuëmëdquid dada uaquin siadmiaido icsho aden cuidposh.

<sup>3</sup> Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacipamboecnuc intacuac. Intacuidpambo icnuc acten icquidtedi unësbudneposh.

<sup>4</sup> Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. <sup>5</sup> Adsho isun mayan bëda utsin acte dayun uaquidën Nuquin Papa chuiposh.

—Aden mimbidi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

<sup>6</sup> “Ëmbi chiaid chuibanquidobëdta ëbi tantiaquido nua intac icnuc chieshëmënuquidon cuesun secabudnepondash,” queshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

<sup>7</sup> Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

<sup>8</sup> Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquiec ushën pichiebudneposh.

<sup>9</sup> Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

<sup>10</sup> Adnubien utsintsen ambi bedboed maspanëmpin cushtoaid chiuimbenequin

acte uquëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh. <sup>11</sup> Adec dacuëdcuededec: —Ambi chiaid niacniacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —queshun Nuquin Papa chushcabededposh.

<sup>12</sup> Adnubien utsintsen ambi bedboed maspanëmpin cushtoid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

<sup>13</sup> Adec aid matses cho-choabi icnuc ushë choacmishun cho-chometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi. <sup>14</sup> Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid

dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

<sup>15</sup> Adnubien Esusquio cuëdposh. — Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

<sup>16</sup> Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

<sup>17</sup> Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. — Padi. Nëbi ëmbi tantiacpadomboen ënquimbi cuidec —queposh.

<sup>18</sup> Adnubien abu bedbedquetanepamboec abu tesquianenuc natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquenededi acquimboec uëdëquiamposh. <sup>19</sup> Adnubien matses dadpen



yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. <sup>20</sup> Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. <sup>21</sup> Abucuëshquio ue dapa choacimboec ue tsasi nuacquid dapa quidos 50 icnuc yuë tanaid dadpenquoio paëdbudnequimbi matses tish-tishbudneposh. Aden ue tsasi dapan mëyansho isun padenquoio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacimboecnuc aden ismeposhi.

## 17

### *Chido chishpidabimboecquid ismiaid*

<sup>1</sup> Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquoio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin

mibi ismenu. <sup>2</sup> Aido icsamboshë iquec. Matses utsi-utsien abi chuiquid dapabobëdta uisma uanten danoshcachimboen Nuquin Papambo tantiamenguio icquin ambi chiaid niacniacmequioposh. Aido cuidsho isec cho — queposh.

<sup>3</sup> Adshumbic ushquin isachimboecnuc ismeposhi. Nuquin Papan Mayanèn tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi. <sup>4</sup> Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aighbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcachimboen: “Nuquin Papa caid nibëdquiec,” quequin tantiamequin matses utsibo dadpenquio icsamequiendac —camenuen aden ismeposhi. <sup>5</sup> Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadméquido nec —quequin dada uaid icposh. <sup>6</sup> Aid chido paëmbo icquid acachimboec Esus tantiaquidon intac acash tan-

tiadenquo yamposh. —Babidonia caid yacnoquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquiobi.

<sup>7</sup> Adbudquioshobini aid mayan bēdan: —“Tantiadenquo iquec,” ¿quecta ique? Tantia. Chido chishpidabēdta abi catsadaid aben icquid chuinu. <sup>8</sup> Mimbi isboed aben icquid icsamboshē icquid ictenedi nēbi nibēdec. Yuecshun Satanasēn abi tabadacnoshon padpiden chomendac. Adoacsho yuecshun Nuquin Papan chian anēdēnquiaco nēsecaindac. Aden cuidabi Satanasēn chomebocsho isun Nuquin Papa tantiesabon: “Comapenen tantiaquidien nechitec. Matses nibēdanēdai uincuenashien choachitosh. Aidi tantianu,” caindac. Matses uabi icquin Nuquin Papan: “Ēbi tantiaquido iquendac,” cacmaidonquo adoendac —queposh mayan bēda.

<sup>9</sup> Adshumbic padpiden chuiposhi. —Tantia. Ēmbi chuiboed bēdamboen tantiamenuen chuinu. Naden tantiamenuen aben icquidēn mapi 7tedi icquid mibi ismiombi. “Babidonia caid yacno matses icsa uaquido tabadacno macuēsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. <sup>10</sup> Aid chuiquid dapabo 5tedi nibēdnubi utsi abi iquec. Nēbi aidēn aton matses namec. Utsitsen choendac. Choshon aton matses nametantsequi badedquo nibēdanendac. <sup>11</sup> Nibēdanēdai choashic Ēmbi ismeboed acte uquēducuēsh choaed chuiquid dapa icsamboshē

icquidquo iquendac. Aidën ëmbi chuiboedo chuiquid dapabo 7tedishun namiac bimboen aton matses icsamboenshë namendac. Adoacsho isun Nuquin Papan icsaido cuidquiacno nësecaindac — queposh mayan bëda.

<sup>12</sup> Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquo nibëdanendac.

<sup>13</sup> Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquo icnuc,” queshun aden icsamboshë icquid abi chuiquid dapa icmendac. <sup>14</sup> Aden Esus chieshënquidon: “Chieshtomenu,” cac Esusën yuaido abi tantiaquidotedi chieshtoenquo iquendac. Aton Icbō Esusën abided cuidadec unësaidën namiac chieshtoenquo iquendac. Aden abi tantiaquidobëdta chieshënquin cuesun secanuec cho-chosho isun Esusëmbi cuesun secaindac. “Èbien matsesën Icbombo nec,” quetanquin adoendac — queposh mayan bëda.

<sup>15</sup> Adashic padpidec: —“Nidaid utsi-utsiec yacno tabadquido dadpenquo Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi.

<sup>16</sup> Aden Babidonia caid yacnocquidon nasho isun mimbi isboed chuiquid dapa icsamboshë

icquidën abëdtan chuiquid 10tedi icquidbëdtan Babidonia caid yacnocquido chieshëndac. Aden chieshënquin cuesun secatanquin shububëdtabi nëdëncaindac nibëdquiecnuc. <sup>17</sup> “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. <sup>18</sup> “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

## 18

### *Nuquin Papan Babidonia caid yacnocquido cuidaid*

<sup>1</sup> Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. <sup>2</sup> Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadteneconombo podobitsiuidpambo tabadendac. Ambobidi edesteuidquio tabadendac. <sup>3</sup> Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bëdabon chuiposhi. <sup>4</sup> Adnubien

Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” queshun aidon namiacpadomboen nainda. Auëshquio niqueta —quesho tantiombi. <sup>5</sup> Nuquin Papa yacnoshombidi utsin chuiposh. — Ënëdenquio yec icsauidequi icsho isun ambi tantiacpadomboen Nuquin Papan cuidquiendac. <sup>6</sup> Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. <sup>7</sup> Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bëdambo iquebi,” quepec Nuquin Papan cuidte tantienquio yequi. Adsho tantiashun: “Natiambo icnuc comapenen cuidquiopashun,” caimbi. Otacquio tantiec: “Nuquin matses yuabo dadpen icnuc nuqui bëdamboec tabadec. Chido niante bënë unësaid mëyadachimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. <sup>8</sup> Adsho ambi: “Nëbi ëbi cuidec,” cacmaidënquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquio nëdënquendac —queposh mayan bëda.

<sup>9</sup> Adashic abi onquec: —Adec Babidonia yacnuësh nēdēnquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. <sup>10</sup> “Tantia. Nuqui tantiaido sidquebudneque,” quec uinte paēdtampamboec dacuēdtanash uanoshon isec tabadendac. Adec tabadec: “Aido unēsquimboshē iquec. Aton matses aton yuabobēdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unēsquimboshē iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec —queposh mayan bēda.

<sup>11</sup> Adashic abi onquec: —Babidonia caid yacnocquido aden cuidacsho isash utsibotsen: “Ēmbi meniaid bedshun piucquid dadpen menedenebi. Nēbi adquid nibēdquiec. ¿Tsuntsimbini ěmbi meniaid cuidquin piucquid menepatsiashba?” quec sedenquecuededendac. <sup>12</sup> Aidobidi: “Nadquid Babidonia caid yacnocquido menequin piucquid dadpen bedtenembi. Nēidic shocosh piu. Nēidic shocoshquo. Nēidic casēdubimboecquid cuēnote bēdambo icquid. Nēidic dashcute bēdambo icquid. Nēidic dashcute piumbo icquid. Nēidic dashcute umumbo icquid. Nēidic sēntebimboecquid nacnenaid. Nēidic aben icquid edepanten shēta nacnenaid. Nēidic cuēte utsi bēdaidquo nacnenaid. Nēidic shocosh utsi nacnenaid. Nēidic cuēnote nac-nacquo icquid nacnenaid. Piucquid dadpen menequin adquidtedi Babidonia caid yac-

nocquidon bedpadenec. <sup>13</sup> Utsitsen dadpen bedpadenec. Nèidic batambo icquid sabimboecquid. Nèidic bédambo nuadte. Nèidic bédambo nuadec danoshquete. Nèidic acte paëmbo icquid. Nèidic bëchi. Nèidic pan nacnentequid. Nèidic nëish yua baca caid. Nèidic nëish yua utsi obeca caid. Nèidic nëish yua cabayo caid. Nèidic matses antsadsho cabayon nimbanquin buante. Nèidic ambi chonoa uatequido matses ambi ampequin bedaido dadpen. Babidonia caid yacnocquidon aitedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido —queposh mayan bëda.

<sup>14</sup> Adashic abi onquec: —Abi piucquid menedenedën dayun uaid nibédanesho isash: “Aid matses bunaidquio ambi dayun uaid pete nibédquiec. Ambi dayun uaid dashcute bédambo icquidbéd aton na utsi dadpen abitedi nibédquiec,” <sup>15</sup> quiash natiambo dacuëdec uanoshon isec tabadec sedenquecuededendac abi piucquid menedenedo tantiec. <sup>16</sup> “Aid matses tantiac unësquimboshë iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casëdubimboecquid shocosh piu nacnenaid payudenec. Utsibic casëdubimboecquid utsi payuec mësiuidtenec. Adec: ‘Con na dadpenquio icnuc bédamboec tabadebi,’ quepadenec Babidonia caid yacnocquido. <sup>17</sup> Adsho isun Nuquin Papan abi ushëmbi cuidquiac ambi dayun



uaidbèd aid matses badedquio nibèdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nèidic cano dapa dancha icbo. Nèidic dancha icbobèd nidquido aton yuabo. Nèidic icbo piucquid meniash dancha antabèdtoquido. Nèidic nuècquid bedshun piucquid bednuen menequido. Aidtedi uanoshon isec sedenquecuededendac.  
<sup>18</sup> Nèdènquec pushudtonesho uanoshon isash: “Adquido utsi nibèdec,” <sup>19</sup> quiash natiaquiec sedenquecuededendac. Adec shubiec: “Èbipadquid dancha icbon bèaidtedi bedshun piucquid dadpen menedenedo tantiac unèsquimboshè iquec. Is. Cuidquiac badedquio nibèdanaque,” quec sedenquecuededendac — queposh mayan bèda.

<sup>20</sup> Adashic mayan bèdabidi: —Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbèd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshènquin natiamiacpadomboen mibi chieshènquido Nuquin Papan uesquin cuidquioshe,” quequin chiendambi — queposh mayan bèda.

<sup>21</sup> Adnubien mayan bèda utsin uidènquio icquidènquio nidaid moco nuacquid dapa yuèmboshè icquid cadotanquin acquimboen acte nènebidanquimbi chuiposh. —Èmbi acquimboen nènebocpadomboen Nuquin Papan Babidonia

caid yacnocquido uesquin cuidquiendac nibëdquiecnuc. <sup>22</sup> Adoac aido ictenecnombo nadimbo iquendac. Ten-tencate ten-tencainquio iquendac. Utsibobic cuëdënenquio iquendac. Utsibobic shoncate shoncainquio iquendac. Cuëte chëshun nacenenuio iquendac. Piacbo macuesenuio iquendac. Nadimboshë iquendac. <sup>23</sup> Tabote taboadaid nibëdendac. Dada aton chido ambi nëbi bedaidbëdi mamënenquio iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac. <sup>24</sup> Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënuquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

## 19

### *Chieshënuquido cuidacsho isash cuishonquiaid*

<sup>1</sup> Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.  
—Nuquin Papa bëdamboshë iquec.  
Aiduidtsëqui matses abitedishun Icbombo nec.

Aton Mado abided cuidadec unësaid tantiasho  
matses bëdamboen isec.

<sup>2</sup> Muesambo icquin ambi chiacpadomboen  
naquidquio nec.

Abi tantiesabo ënëdenquio yec icsauidequi icsho  
cuidquidquio nec.

Adquid icquin: "Icsamboshë iquec," quequin mat-  
ses utsibo icsamequido Babidonia caid yac-  
nocquido cuidquioposh.

Nuquipadquid Esus tantiaquido cunesun secacsho  
isun cuidquioposh

—quec cuëdëncuededposh.

<sup>3</sup> Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncaquin  
Babidonia caid yacnocquido uesquin  
cuidquioshe

—quec cuëdëncuededposh Esus tantiaquido dad-  
penquioshë.

<sup>4</sup> Adsho tantiash Nuquin Papa chuiquid dapan  
tsadten tsadnuc abi dacuenadec tabadquido:

—Nuquin Papa Nuquin Icho nec —quequin  
ismenuec danëshën tinquebudcuededposh.

Adec tinquebudcuededequi: —Abimbo caic.  
Nuquin Papa bëdambo iquec —quecuededposh

dadanobi ëshëcquido 4tedi icquido tsusiobo 24tedi  
icquidobëdi. <sup>5</sup> Adashic auëshquiobidi abentsëc  
cuëdposh.

—Nuquin Papa matses uaquidquio yec  
bëdamboshë iquec, canuna.

Nuquibi abi tantiaquidtedishun: "Nuquin Papa  
bëdamboshë iquec," canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna —queposh.

*Esusën abi tantiaquido beduante chiaid*

<sup>6</sup> Adsho tantiash abu tesquianiacbimboec actenua chododoquiacbimboec Nuquin Papa yacnoquido dadpenquo cuëdëncuededposh.

—Abi chieshëncuidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

<sup>7</sup> Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquo beduanacbimboen abided ciudadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacbimboec:

“Nëbien con Icbo chochitec,”

quiash Esus tantiaquido bëdamboec tabadec.

<sup>8</sup> Abi tantiasho Nuquin Papan bëdamboen isaidoyec abi icsaid ënash:

“Nëen con Icbo chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiuinacbimboen abitedi icsaisa icmendac

—quec comapenec cuëdëncuededposh.

<sup>9</sup> Adnubi mayan bëdan chuioaposhi. —Ëmbi chuibocpadomboen dada uata. “Ësadaidbo aton chido bedquin aton matses cho-chomiash pemec

bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuis-honquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bëda.

<sup>10</sup> Adsho tantiashini Nuquin Icho danec ismenuec danëshën tinquebuduidpoc. Adshobini: —Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

*Cabayo ushu catsadquid bëdamboshë icquid*

<sup>11</sup> Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh. <sup>12</sup> —Matsesën ompodëmëdtiapimbo icquidquio nec —camenuec cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bëdada uadaid tantiadenquio icposh. Utsibon tantiatiapimbo icnuc ambentsëqui tantiate niosh. —Nuquin Papabëdtan Esusën naidtedimbo matsesën

tantiatiapimbo iquéc —camenuen adéc bédada uadaid ismeposhi. <sup>13</sup> Abi cuëmédquid utsiembi tantiatsëccoc. —Nuquin Papapadquidquío yec abi tantiamianquid nec —quequin cuënaid niosh. Aton dashcute bëntse icquid cuidaidën intaquën punacbimboec piumboshë isadposh. —Abi tantiesabo cuidquidquío nec —camenuen aden ismeposhi. <sup>14</sup> Esus bëyuc nidnuc abi tsibanec abi tantiaquidobéd mayan bédabo cabayo ushucquiduidquío catsadcuededec cho-choposh. Icsaisa icmiaido yec dashcute ushumbo icquid bëchish nibédquidquío dasiuidcuededposh. <sup>15</sup> Abi bëyucquid ana shëcuënuëshquío chështe cuënumbo icquid cueshqueposh. —Ambi chiacpadomboen matses icsaído abitedi cuidquidquío Esus nec —camenuen aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishacbimboen nua intac icnuc cuesun secaindac. <sup>16</sup> Aton dashcute bëntse icquidën abi cuëmédquid utsi dada uaccosh. —Abipadquid utsi nibédnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

<sup>17</sup> Adnubien ushë mëducquío tabadquin mayan bēda utsin edeste chedo abuc cuen-cuensho comapenec cuédquin chuiposh. —Nuquin Papan cuidquin cuesun secaidon nami chec cho-cho.

<sup>18</sup> Ęmbi chiacpadec cho-choshon matsesën nami mimbi nua tēpuisquin chendac nēidtedi. Nēidic matses utsi-utsien chuiquid dapabo. Nēidic

sondado chuiquid dapabo. Nèidic dada cuesabo. Nèidic cabayo chedo abi catsadquidobèdtabi. Nèidic matses utsibo abitedimbo. Nèidic matses yuabo. Nèidic matses yuapenquio. Nèidic bacuëbo. Nèidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

19 Adshumbic mayan bédan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobèdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobèdta cuesun secanu —caqui <sup>20</sup> cuesun secadenquio icposh. Adshobien Esusèn acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasèn oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabèdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. <sup>21</sup> Adshumbic

Esusën ana shëcuënuësh chështe cuënumbo icquid cueshquequidën: —Ëbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

## 20

### *Satanas uidën uaid*

<sup>1</sup> Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaid dapa sanamposh. <sup>2</sup> Adshumbic Eba icsamenuec nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. <sup>3</sup> Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puđuentiapimbo icnuc. Seta dadpenquio 1000tedi matameshun bëtashite chicshun Satanas cuemenuen adoposh. — Aden seta 1000tedi matamiabi icquin abi uidën uactedembi matses muauaquin icsametiapimbo iquec —qeshun chicten bidiaquin uidën uaquioposh. Aden ismeposhi.

<sup>4</sup> Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid



abimbo chuibamposh. Aden matses bédamboen nameposh. Satanas uidèn uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uguëducuësh choboed chuiquid dapabëdta abibimboecnuc nacnenaïd tantiapimbo icquido neposh. Adechidi: —Aidèn yua nebi —quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiad tabadposh. <sup>5</sup> Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. <sup>6</sup> Adnubien tauaquin uincuemiaido bédambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “‘Esusbëd Nuquin Papa bédamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bédamboen namequid nendac —quequin aden ismeposhi.

*Satanasquio chian anëdënquequid nëniaid*

<sup>7</sup> Adshumbic aidtedquio seta 1000tedi matameshun uidèn uaid chicquin Satanas cuemendac. <sup>8</sup> Adoaquien matses icsamenuec muaquin chiec nidaïd utsi-utsiec yacno nidendac. Aden aidèn muaquin namiaquien matses dadpenquio Esus chedo cuesun sianuec tsidadendac. Nëïdic nidaïd Coc caïd yacnocquido.

Nëidic nidaid utsi Macoc caid yacnocquido. Nëidic matses utsibo abitedi cuète podotedi dadpenquioshë.

<sup>9</sup> Aidedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. <sup>10</sup> Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanatsen nënendac. Adoac aido ënëdenquio yec natiamboshë iquendac. Aden ismeposhi.

### *Icsambo icquido cuidte chiaid*

<sup>11</sup> Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuc adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec.

<sup>12</sup> Nuquin Papa yacno unësaido uincuemiaido abitedimbo tabadposh. Adnubien bëshunenquio icquin dada uaten dada uabanacbimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh.

13 Unësaïdo abitedi icposh. Utsi-utsiec unësacsho chian dapa mad caid nëniaïdo uincuemiaïdo nïosh. Utsi-utsiec nidaidën chococaid uincuemiaïdo nïosh. Adsho aidon naidtedi Nuquin Papan chuïbamposh. 14-15 Adshumbic Esus tantiesabo icsho documento nibëdquïdbimboecsho abi yacno tabadmenquïo icquin chian dapa anëdënquequïd uesquin nësecabamposh. Aden Esus tantiesabo nësecan unëstequïdo utsibo nibëdposh. Esus tantiesabo aton dada unësan abi tantiate tabadacno utsibo tabadenquïo icposh. Adnubien Esus tantiaquïdo Nuquin Papa yacno tabadec unëstiapimbo icquïdquïdquïo icposh. —Adquïd iquendac —quequin aden ismeposhi.

## 21

### *Nuquin Papabëd tabadaidquïo*

1 —Esus tantiesabo chian anëdënquequïd nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquïduïdquïo icposh. Ënden iccondaïd chian dapa mad caïdtsen nibëdposh. 2 Adnubien Esusbëdi Nuquin Papa tabadaidquïo abichobi Edusaden chuca caïd abucuësh budposh. Chïdo nëbi bedboedën aton bënë cuïshoncamiacimboec cuïshoncamiänquïd yec bëdamboshë icposh. 3 Adnubien Nuquin Papa tsadacnuëshquïo comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquïo yec. Adsho isun aton yuabo

icquin matses abitedishun: “Nuquin Icbombo nuqui tantiaidquio nec,” caindac. <sup>4</sup> Ambo Nuquin Papan abitedi chuca uacnombo aaidbèdi tabadec matses shubitiapimbo iquendac bëun ucacbimboec. Nidaid shënin tabadec abitedi unëstequidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

<sup>5</sup> Adnubien abitedishun Icbombo yec chuiquid dapan tsadten tsadquid onquedoposh. — Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbèdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaid nec —queposh Nuquin Papa Esusbèdi.

<sup>6</sup> Adashic Nuquin Papa padpidec onquec: — Ëmbi chuiboctedimbo nainquin naindambi utsi-bon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacbimboec ëbëd tabadte bunquidon con Mado Esus tantiasho ëbèdi tabadmendambi. <sup>7</sup> Satanasën: “Chieshtomenu,” cauidaido Esusbëdta ëbi chieshtoenquio icquin tantiaquido ëbèdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi mibi nec,” caindambi. <sup>8</sup> Adshumbic utsibo chian dapa anëdënquequid icsamboshë

nuadquid nësecaindambi. Nèidtedi icsamboshë icquido adoendambi. Nèidic ëbi bëdiactsëc tantiauidtsëchoedobi chieshëmënquidon: “Cuesnu,” cac chieshtoash tantiesa yanoaïdo. Nèidic Esus tantiesabo abitedi. Nèidic icsamianquido. Nèidic chieshëmë nec cuesunianquido. Nèidic dada aton dada utsibëdi chichudnanquido. Nèidic aton chidopenquio chudquido. Nèidic aton bënëpenquio chudmequido. Nèidic nënëchoquidobëdtabi cuëte podon unës uante bunquido. Nèidic ambi nacnenaidi papa caquin tantiaquido. Nèidic muauanquido. Aidtedi chian dapa anëdënquequid nësecaindambi —queposh Nuquin Papa.

*Abi tantiaquido Esusbëd icte chiaid*

<sup>9</sup> Adnubien mayan bëdan Nuquin Papan matses cuidte cushtoaid chiuimboed abentsëc choshon chuioposhi. —Isec cho. Chido nëbi bedboedën aton bënë cuishoncamiacimboen abided cuidadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen. <sup>10</sup> Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. <sup>11</sup> Aid tabadaidquio aid shubutedi Nuquin Papa tabadaid yec abi yacpadquio abichobi bëchamuanquiecposh. Casëdu bëdambo icquidbimboec isquid-isquidquio isadposh. <sup>12</sup> Shubu abitedi nënantan icnuc abichobi daquënë

uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bédabo 12tedbidi icposh. Aid shëcuë bétashte 12tedbidi icposh. Aid bétashten Acobon mado cuëmédquid 12tedbidi dada uabampaccosh naden. Bétashten Acobon mado Ose cuëmédquid dada uatanquin bétashte utsin Acobon mado utsi Uda cuëmédquid dada uatanquimbic adenuidi bétashten bétashtenquien Acobon mado cuëmédquid cuëmédquidquien dada uabampaccosh. <sup>13</sup> Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidtedbidi shëcuë icoaposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh. <sup>14</sup> Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbéd icquido ëbitedi cuëmédquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmédquid Uan dada uatanquin cuënote utsin Petedo cuëmédquid dada uapaccosh. Adenuidi cuënoten cuënotenquien Esusbéd icquido cuëmédquid cuëmédquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmédquidotedi dada uaidbëdta Esusbéd icquido cuëmédquid dada uaid aden ismeposhi.

<sup>15</sup> Adshumbic ëbi chuiboedën mayan bédan

shocosh bēdaidquio nacnenaid tambante sanamposh. —Nuquin Papa tabadacno tambanquin daquēnē uaidbēdtabi puduedte shēcuētedi tambanten tambanu —queposh.

<sup>16</sup> Adoshombic cuēma abitedi tambanac cuēma tiombi-tiombimboec icposh. Cuēma auc abentsēc tanac quidometedos 2,200ted cactiombi iccosh ēnapenquioshē. Aidtionuidi iccosh cuēma abitedi. Adoshombic abuc yacmi cuembotsen tanac aidtionquiobidi icposh.

<sup>17</sup> Nidaid cuēnote nuamboshē icquid dapa tsindoquin daquēnē uaid bitsipambo icquidtsen tanac nuamboshē bitsi icposh. Matsesèn nacnenaid tambanten tanac metedos 65ted cactiombi icposh nuamboshē bitsipambo.

<sup>18</sup> Daquēnē uaid abichobi isquid-isquidquio isadposh. Bēdamboshē icposh. Padnuen shubu abitedi shocosh bēshpiu-bēshpiuctsēcquid nacnenaiduidquio yec nac-nacquio icposh.

<sup>19</sup> Aid daquēnē uaquin tauaquin sandoaid nidaid cuēnote dapa casēdubimboecquid bēdambo icquid matses comapenec bunaidquio utsi-utsien dabitaccabanaid niosh. Abentsēc aspe caid umu-umumboctsēcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi.

<sup>20</sup> Utsibic onise caid piumbo icquid. Utsibic conadina caid piu-piupactsēcquid. Utsibic quidisodito caid bēshpiu-bēshpiupactsēcquid. Utsibic bedido caid umu-umupactsēcquid utsi. Utsibic topasio caid piu-piupactsēcquid utsi. Utsibic quidisopadasa caid nushan-

nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidededi dabitaccabanaccosh. — Nuquin Papa yacnombo bédamboshë iquendac —camenuen aden ismeposhi. <sup>21</sup> Daquënë uaid puduedte shëcuë 12tedi icposh. Aid bêtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsëcquid acte-actectsëcquio icnuc mabiunaid icposh. — Esusbëd Nuquin Papa tabadacnombo bédambo icquiduidquio iquendac —camenuen aden ismeposhi.

<sup>22</sup> Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquioquin tantiec anocquido tabadendac. <sup>23</sup> Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquio iquendac. — Nuquin Papa icsaisambo icnuc abi yacno icsaido nibëdqiuo iquendac —camenuen aden ismeposhi. <sup>24</sup> Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenenec tabadcuenash: — Esusbëd Nuquin Papa abitedishun Icbombo nec.



Abipadquid utsi nibëdec —quendac. <sup>25</sup> Nuquin Papa matsesbëdi tabadacnombo inchëshenquio icnuc: —Icsambo icquido puduednushe. Bëdashnu —quetiapimbo icsho isun daquënë uaid shëcuë bëtashenquio iquendac. Shëcniacchobi iquendac. <sup>26</sup> Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi. <sup>27</sup> Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquio iquendac —quequin aden ismeposhi mayan bëdan.

## 22

### *Nuquin Papa yacno acte ismiaid*

<sup>1</sup> Adshumbic aid mayan bëdan padpiden ismeoposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmetequid acte bëdambo icquid nushan nibëdquidquio chëuëdsho ispombi. <sup>2</sup> Nuquin Papa yacnuëshquio choec chëuëdec ambo tabadquido

Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmetequad cuëtetsen icposh. Baded-badedquiec bacuëquidquo niosh. Inchëshën ushë choanchoanquiec badedquido bacuëquid niosh. Aid cuëte podo nidaid utsi-utsiec yacno tabadquido bëdambo icmetequad niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. <sup>3</sup> Aden abitedi bëdambo icmiac cuidtequido nibëdquido iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquiec Esus tantiaquido tabadendac. <sup>4</sup> Adec: —Con bacuëbo nec —quequin Nuquin Papan abi cuëmëdquid dada uaqin bësiaidon Nuquin Papambo bëisquiec tabadendac. —Nidaidën tabadec bëdamboec tabadquido Nuquin Papabëd tabadec abipadquido bëdamboshë yanendac —camenuen aden ismeposhi. <sup>5</sup> Ambo bëdambouidquido yec inchëshenquio iquendac. Nuquin Papa bëchamauanquiecquidëmbi ushëmbouidquido iquendac inchëshaid tantiadenquio yec. —Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

<sup>6</sup> Adshumbic mayan bëdan chuioaposhi. —Tantia. Mibi chuinu. Nuquin Papan Mayanën

tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën nami-aid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

### *Esus chote chiaid*

<sup>7</sup> Adnubini Esusënquoio naden chuiposh. — Chieshtoenquoio icquin ëbi tantiata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

<sup>8</sup> Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. <sup>9</sup> Adshobini: —Padi. Aden ëbi ismenda. Mibipadquid Nuquin Papan yuabidi nebique. Ëndenquimboshë Nuquin Papan tantiamiac min tsusedpabo isadaidbon ambi chiaidquoio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bëdan.

<sup>10</sup> Adashic padpidec: —Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquoio icquin Esus tantiec ma tabadnu,” queshun dada

uata. <sup>11</sup> Nëbimbobi Esus chonoc Esus tantiesabo badedquoio bëdamboec tabadcuentiapimbo iquendac. Abi icsaid badedquoio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

<sup>12</sup> Adnubini Esusën chuioaposh. — Chieshtoenquoio icquin ëbi tantiata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. <sup>13</sup> Nuquin Papapadquidquoio nebi. Ëmbi tantiacmaid nibëdnuc abitedi comapenen tantiaquidquoio nebi. Nidaid uabi yec ictenedi nëbi adquidquoio yec nibëdantiapimbo icquid nebi. Adquid yec abitedishun Icbombo nebi.

<sup>14</sup> Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen.

<sup>15</sup> Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquoio chudquido. Nëidic aton bënëpenquoio chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaiduidquoio naic muauanquido. Aidtedi Nuquin Papa yacno puduedtiapimbo iquendac.

<sup>16</sup> Ëmbi chiacpadomboen mayan bëdan mibi

ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dëniacnu,” cadiapimbo icquid nebi. Adquid icquin matses abitedimbo namendambi — quequin chuiposhi Esusèn.

<sup>17</sup> Adsho tantiashun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquio tantiabenta —caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: —Nëbimbobi chonoshe. Aidquio tantianuna —cac bëdambo ictsiash. Adsho tantiash Esus tantiesabo acte bunacbimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

<sup>18</sup> Tantia. Ëmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. <sup>19</sup> Adembidi ëmbi dada uaboed utsi uainquio icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquio ictsiashe. Adembidi bëdamboshë yacno abëdi mibi tabadmenquio ictsiashe.

<sup>20</sup> —Ma aidtedi tantianu —quequin Esusën chi-acpadomboen mayan bēdan aidtedi ismeposhi. Ĕmbi chuibocpadomboen Esusën: —Nēbimbobini choendac —caposhi. Adsho tantiashun: —Ai, nēbimbobi chota —capombi.

<sup>21</sup> Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bēdamboen isquin bēdambo icmepashun —caimbi. Padi. Aidtedi chuiquin dada uaombi.

## **Esuquidistu Chuiquin Tantiamete New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

446da786-5bd1-5ffa-85e2-9eff4052cf8b